

KERATAN AKHBAR

TARIKH : 28 JUN 2025

AKHBAR : SINAR HARIAN

MUKA : 4
SURAT

Rafizi persoal isu rombak RMK 13 saat akhir

4 NASIONAL
SINAR HARIAN • SABTU 28 JUN 2025

Sinar
Harian

TELUS & TUEUS • HATA DAN TELUS RAKYAT • PEMACU PERUBAHAN

Rafizi persoal isu rombak RMK13 saat akhir

SHAH ALAM - Bekas Menteri Ekonomi, Datuk Seri Rafizi Ramli mempersoalkan isu 'merombak semula draf Rancangan Malaysia Ke-13 (RMK13)' yang hanya timbul di saat akhir sedangkan tidak pernah dibangkitkan sepanjang beliau dan Kementerian Ekonomi membentangkan inisiatif dasar itu.

Rafizi berkata, pihaknya khutir sekiranya kerajaan bersikap reaktif kerana ada beberapa ciapan balas kepada Menteri Komunikasi, Datuk Fahmi Fadzil mengenai RMK13 beberapa hari kebelakangan ini.

Menurutnya, terdapat netizen membincangkan mengenai RMK13 dan membalas ulasan Fahmi yang di-

lihat cuba memadamkan terus penglibatannya dalam penyediaan RMK13.

"Kenyataan untuk 'merombak semula dan mengolah' RMK13 sudah tentu mengundang kebimbangan (dalam kalangan penjawat awam, penganalisis pasaran yang memartutai dasar negara dan rakyat keseluruhannya).

"Adakah ini bermakna rombakan semula ini akan dibuat secara tergesa-gesa kerana tiada masa untuk merujuk semula kepada Inter Agency Planning Group (IAPG), Technical Working Group TWG



RAFIZI

dan pakar-pakar?

"Kenapa isu 'merombak semula draf RMK13' ini timbul di saat akhir. RMK13 adalah dokumen penting untuk negara yang dibangunkan oleh ribuan rakyat dari segenap lapisan masyarakat," ujarnya dalam satu kenyataan pada Jumaat.

Sebelum ini, Ketua Setiausaha Negara, Tan Sri Shamsul Azri Abu Bakar mengeluarkan kenyataan bahawa Menteri Kewangan II, Datuk Seri Amir Hamzah Azizan akan mengetuai usaha rombakan tersebut.

Menurut Rafizi, tindakan mengheret RMK13 menjadi polemik politik akan melunturkan keyakinan rakyat kepada dokumen akhir dasar itu.

"Jika ini berlaku, ia satu ketidakadilan besar kepada mereka yang bertungkus lumus bekerja berbelas jam sehari sejak setahun lepas.

"RMK13 bukan sekadar dokumen perancangan biasa, tetapi dasar lima tahun negara yang menjadi rujukan utama merentas pentadbiran kerajaan, kecuali dipinda melalui Parlimen.

"Penyediaan RMK13 dibuat melalui proses 'bottom-up' dan 'top-down' yang melibatkan input pelbagai pihak," jelas beliau.


Amir Hamzah galas tugas Menteri Ekonomi

Tugas utama beliau adalah rombak semula RMK13 yang akan dibentangkan di Parlimen pada 31 Julai ini

SHAH ALAM

Menteri Kewangan II, Datuk Seri Amir Hamzah Azizan, dilantik menjalankan tugas dan fungsi Menteri Ekonomi berkuat kuasa serta-merta.

Ketua Setiausaha



AMIR HAMZAH

Negara, Tan Sri Shamsul Azri Abu Bakar berkata, perkara tersebut dipersetujui Perdana Menteri, Datuk Seri Anwar Ibrahim dan dimaklumkan dalam mesyuarat Jemaah Menteri pada Rabu.

"Perdana Menteri telah memaklumkan Jemaah Menteri yang bersidang pada 25 Jun 2025 bahawa beliau bersetuju supaya Amir Hamzah menjalankan tugas dan fungsi Menteri Ekonomi berkuat kuasa serta-merta," katanya dalam kenyataan.

Terdahulu, Ahli Parlimen Pandan, Datuk Seri Rafizi Ramli mengumumkan peletakan jawatan sebagai Menteri Ekonomi pada 27 Mei lalu.

Shamsul Azri berkata, tugas utama Amir Hamzah sebagai Menteri Ekonomi adalah untuk mengolah dan merombak semula inisiatif naskhah Rancangan Malaysia ke-13 (RMK13) yang akan dibentangkan di Parlimen pada 31 Julai ini.

"Proses itu mengambil kira maklumat tambahan yang dikemukakan oleh kementerian, pandangan dan ulasan yang diberikan oleh Jemaah Menteri," ujarnya.

Sementara itu, Kementerian Ekonomi yakin Amir Hamzah mampu merajai portfolio baharu yang disandangnya dengan lebih mantap, berupaya memperkukuhkan daya tahan ekonomi negara dan memastikan pertumbuhan seimbang dan adil bersandarkan pengalaman luas dimiliki beliau.

Kementerian berkenaan dalam kenyataan di Facebook menyambut baik kehadiran Menteri Kewangan II itu dengan penuh hormat dan kesyukuran seiring dengan peranan yang digalas beliau dalam melaksanakan tugas dan fungsi Menteri Ekonomi.

Kementerian Ekonomi turut memaklumkan, Amir Hamzah memulakan tugas yang baharu disandangnya dengan penuh semangat, seel perjumpaan bersama pengurusan tertinggi kementerian itu pada Jumaat.

Cabaran besar menanti Amir Hamzah

SHAH ALAM - Datuk Seri Amir Hamzah Azizan menggalas tanggungjawab besar selepas dilantik untuk menjalankan tugas Menteri Ekonomi, dalam meneruskan agenda pemulihan dan pertumbuhan ekonomi negara terutama menjelang pembentangan Rancangan Malaysia Ke-13 (RMK13).

Pensyarah Kanan Fakulti Ekonomi dan Pengurusan Universiti Kebangsaan Malaysia (UKM), Profesor Madya Dr Mustazar Mansur berkata, antara cabaran utama yang menantinya ialah mengolah dan merombak semula inisiatif naskhah RMK13 agar selari dengan aspirasi Malaysia sebagai negara maju berteraskan rakyat.

Menurutnya, Amir Hamzah juga perlu memastikan dokumen dasar lima tahun yang dijadual dibentangkan pada 31 Julai ini mampu membawa keseimbangan pembangunan antara wilayah dan mengurangkan ketidaksamaan antara rakyat.

"Kita bimbang apabila negara semakin maju, ada kelompok yang terlepas pandang. RMK13 ini mesti menyentuh golongan B40, M40 dan kawasan yang selama ini ketinggalan.

"Jadi, beliau perlu pastikan tidak wujud jurang yang lebih besar antara yang kaya dan miskin," katanya kepada *Sinar Harian*.

Beliau berkata demikian ketika diminta mengulas tentang Amir Hamzah yang juga Menteri Kewangan II, dilantik menjalankan tugas dan fungsi Menteri Ekonomi berkuat kuasa serta-merta.

Menurut Mustazar, kelebihan Amir Hamzah terletak pada latar belakang korporatnya yang luas melibatkan KWSP,

TNB, Shell, MISC, Petronas dan pelbagai lagi, membolehkan beliau memahami keperluan rakyat dan ekonomi negara secara menyeluruh.

"Antara cabaran ketara yang perlu diberi perhatian ialah impak ketidakstabilan geopolitik dunia terhadap harga minyak mentah global yang boleh menyebabkan peningkatan subsidi domestik dan menekan kewangan kerajaan.

"Walaupun negara mendapat hasil daripada eksport minyak, kita masih langgung subsidi seperti bahan api dan elektrik. Dalam keadaan fiskal semasa, ini satu tekanan besar kepada kerajaan.

"Sebab itu pelaksanaan subsidi bersasar, bantuan tunai dan program seperti Jualan Rahmah perlu diteruskan. Ini pendekatan langsung bantu rakyat dalam situasi kos sara hidup tinggi," ujarnya.

Mustazar berkata, latar belakang Amir Hamzah sebagai teknokrat dan bukan politik memberi kelebihan kerana beliau tidak terikat dengan tekanan politik dan boleh memberi tumpuan sepenuhnya kepada pelaksanaan dasar.

"Saya bukan kata (Datuk Seri) Rafizi (Ramli) tidak bagus, tetapi saya lihat faktor politik banyak jejakkan beliau. Amir Hamzah datang dengan kelebihan neutraliti politik dan tumpuan penuh kepada ekonomi. Ini penting dalam situasi sekarang," ujarnya.

Beliau berkata, sesi libat urus menyeluruh perlu dilakukan menjelang pembentangan RMK13 bagi memastikan semua pemegang taruh, daripada rakyat marhaen hingga syarikat besar dan kerajaan negeri dapat menyuarakan pandangan dan keperluan masing-masing.

